

09. juli 2015

UKA 2015/37

Inatsisartut suleriaasianni § 33 naapertorlugu Inatsisartut aalajangiiffigisassaattut siunnersuut matumuuna imaattoq saqqummiuppara.

**Nunaqavissut tikisitallu akornanni Namminersorlutik Oqartussani, Namminersorlutik Oqartussat suliffeqarfiutaanni kommuninilu sulisut qanoq agguatarsimanersut pillugu kisitsisinnorlugu (statistisk) paasissutissamik Naalakkersuisut UPA2016-imi saqqummiusseqqullugit peqquneqarnissaannik Inatsisartut aalajangiiffigisassaattut siunnersuut. Nalunaajaaneq Kalaallit Nunaannut suliffissarsiortut killilersimaarnissaat pillugu Inatsisartut inatsisaat saqqummiussinermi aallaaviusaaq.**

(Inatsisartunut ilaasortaq Suka K.Frederiksen, Siumut)

**Tunngavilersuut:**

§ 37 naapertorlugu apeqquteqarninni Naalakkersuisumit akissutigineqarpoq Pisortat pigisaani, Namminersorlutik oqartussani, Kommuuninilu atorfiit nunaqavissunik taarseriartuaarneqarnissaanut allatut iliuuseqarnissamik pilersaaruteqartoqanngitsoq, taamatut akissuteqarnermut tunngavigitinnerqarpoq *”ingerlatseqatigiiffiit ataasiakkaat siulersuisa aqutsisuisalu nammineerlutik”* isumagisariaqartussaammatigit.

Nunatsinni sapinngisamik nunaqavissut atorfinnut amerlanerpaanut atorneqassasut qulakkeerneqartariaqarpoq, ilinniartitsisinnaangilagummi suliffisaqartinnagillu, taamaattumik avataaniit pisariaqartitsinerput sapinngisamik annikillissartariaqarparput nammineersinnaaneq aningaasarsiornikkut inuuniarnikkullu aqqutissaammat pitsaanerusoq, taamaattumik pingaaruteqarpoq alloriar-toqartarnernik takussutissanik pigisaqarnissarput.

Takussutissanik pigisaqarfigineqartutuaq tassaavoq Naatsorsueqqissaartarfik aqqutigalugu paasissutissat, taakkuli sukumiinnerusumik takussutissaqarfiunngillat. Ullumikkut aqutsinissamut tunngavissatuaraarput ”Kalaallit Nunaannut suliffissarsiortut killilersimaarnissaat pillugu Inatsisartut

inatsisaat nr. 27 30. oktober 1992-imeersoq” taassuma qulakkeerniartussallugu nunatsinni kalaallip suliffissaqarniarnermi salliunneqarnissaa.

Maanna aaqqissuulluakkamik nalunaarsuinngikkaluarluni ersarippoq tikisiat agguaqatigiissillugu sivisuneq ajortoq nunatsinni najugaqarnerat – sivisunerpaamik ukioq ataaseq nunatsinneeriarlutik angerlartarlutik, nunatsinnut akisoorujussuulluni tamanna.

Illuatigut ilinniarluarsimasut allagartartaartartut amerliartortut ilisimavarput, taamaattoq nunaqavissut tikisitallu akornanni qanoq sulisutigut agguataarisoaqarnersoq takussutissaqarnata, kingunerisaannillu ingerlaavartumik atorfiit inuttaassarsiuussat kikkunnit tiguneqartarnerannik takussutissaqarnata, tamannalu aaqqittariaqarmat naalackersuinikkut pisussaaffiusariaqarpoq alloriartitsinissaq, tamannalu inatsisartuniit piumasaqaatigineqarpat alloriarfiusinnaassaaq.

Pisortat pigisaanni qaffasissunik atorfiit nunaqavissunik taarseriartuaarneqarnissaannut naalackersuinikkut iiliuseqarnissamik kisitsisinik takussutissaqarnissarput pisariaqarpoq. Iisimasariaqarparput sumut ingerlanerluta, suullu atorfiit annerusumik ilinniartitaanikkut nunaqavissunik ”ussassaaru-tiginerusariaqarnerigut”.

Taamaattumik siunnersuummi ujartorneqarpoq takussutissiortoqassasoq nunaqavissunut avataaneersullu immikkut atorfiit suussusaat ilanngullugit agguataarnerisa takussutissiornissaat.

### **Namminersorlutik Oqartussanut allaffissornikkut aningaasatigullu kinguneqaatissai:**

Siunnersuut aningaasatigut kinguneqassaaq misissuinermi piumasaqaataasammat paasisutissanik (data) katersinissaq oqartussallu soorluttaaq Namminersorlutik Oqartusat suliffeqarfiutaasa akornanni ataqatigiissaarinissaq peqqutigalugu. Iimagineqartariaqarporlu suliffeqarfiit, Namminersorlutik Oqartussat kommunillu sulisutik pillugit pissarsiariuminartunik paasissutissaateqassasut, aningaasartuutunik annikillisaataasinnaasumik. Aningaasartuutissat annertussusissaat suliap siunertaanik naammassinninnikkut aatsaat ersarissumik annertussusiisoqarsinnaavoq.

Taamaattumik siunnersuuteqartup naatsorsuutigaa nalunaajaanerup suliarineqarnera allaffissornikkut aningaasartuutissat katikkaanni pisortanut inuup ataatsip ukiumut naammassisinnaasai aallaavigalugit 500.000 kr.-it missaanio naleqassasoq, tassunga qaavatigut ilanngutissallutik suliap nutserneqarnera.

**Namminersorlutik inuussutissarsiortunut allaffissornikkut aningaasatigullu kingunissai:**

Namminersorlutik Oqartussat suliffeqarfiutaat aningaasartuuteqartinneqasapput siunnersuut akuerineqarpat, naatsorsuutigineqartariaqarpormi suliffeqarfiit allaffissornikkut sulisussamik/nik illikartitsisariaqassasut misissuinermi nalunaajaanermut paasissutissanik katersinerminni.

Siunnersuuteqartup ilimagaa aningaasartuutissat annertunaviangitsut. Siusinnerusukkut oqaatigineqareersut naapertorlugit paasissutissat suliffeqarfinni sulisut ataasiakkaat pillugit paasissutissanik pigisaqareermata, taamaattumik suliaq Namminersorlutik Oqartussat suliffeqarfiutaanut qassiiliutaannani naammassineqarsinnaalluni. Siunnersuuteqartup ilimagaa aningaasartuutit inuup ataatsip ukiumut naammassisinnaasai naatsorsuutigalugit suliffeqarfinnut ukiup affaanik sivilisussuseqassasoq.

**Inunnut ataasiakkaanut allaffisornikkut aningaasatigullu kingunissai:**

Soqanngilaq